

皇
明
典
禮
志

右門後曰乾清宮爲正寢後曰交泰殿又後曰坤寧宮爲中宮所居東曰仁壽宮西曰清寧宮以奉太后又東曰文華殿西曰武英殿西北曰寶善門武英殿東北曰思善門後曰仁智殿

中宮受朝賀所也文華殿東南曰東華門武英殿西南曰西華門官後門曰玄武門皇城內宮城外凡十有二門曰東上門曰東上北門曰東上南門東中門西上門西上北門西上南門西中門北上門北上東門北上西門北中門復于皇城東南建

皇太孫宮東安門外東南建十二王街通爲屋八千三

百五十楹。

正統六年重建三殿。

嘉靖十五年以清寧宮建慈慶宮。以仁壽宮大善殿建慈寧宮。

嘉靖十年正月

上諭大學士張璠宮中地隘屋衆。貫以通棟。每苦火患。聞南京宮中諸門皆磚砌。不用木。固知

聖祖慮深。今量爲規畫。務使道途踈豁。勿令相近。如

南京制。

三十六年八月甲申。大學士嚴嵩疏言。昨奉

聖諭殿名奉天是已卽天也

皇祖何取臣仰窺

聖德不以天自居傳記有曰人君其尊如天孔子作春秋繫王于天又書曰天命天討言人君賞罰不自已出一歸于天

祖制已久宜勅禮官集議以俟

聖裁

上曰卿釋奉天二字義甚正第非題扁用也遂勅部曰人君奉天已身坐之終未安况灾燬初罹兩蒙昭示名稱之舊不可復于是禮部會議言

皇祖肇造之初名曰奉天者昭揭以示虔爾既以命名則是昊天監臨儼然在上臨御之際坐以視朝似未安修復之始乞睿斷更定以答天庥

上曰俟至期奏于南郊太祖更

三十七年重建奉天門更名曰大朝門

四十一年九月甲申更名奉天殿曰皇極。華蓋殿曰中極。謹身殿曰建極。文樓曰文昭閣。武樓曰武成閣。左順門曰會極。右順門曰歸極。奉天門曰皇極。東角門曰弘政。西角門曰宣治。是日百官表賀。仍詔告天下。初殿工成。工部請額。

上諭內閣曰朝殿

太祖名之

成祖因之不更上天垂示今已兩矣豈謂

太祖定名莫非奉天改之必前代所無之名今只仍
祖惟天字當出奉字上于是部臣以扁式請爲橫
扁又字居中上出奉殿二字兩傍稍下相對

上謂不雅乃取尚書洪範字義更名仍改乾清宮右
小閣名曰道心旁左門曰仁蕩右門曰義平

四十四年作玉芝宮宮門外曰芝祥前門曰寶慶
後殿曰大德

西苑

嘉靖十三年九月己亥西苑河東亭榭成

上親定額曰天鷲房北曰飛靄亭迎翠殿前曰浮香亭寶月亭前曰秋輝亭昭和殿前曰澄淵亭後曰趨臺坡臨漪亭前曰水雲榭西苑門外二亭曰左臨海右臨海亭北閘口曰湧玉亭河之東曰聚景亭改呂梁洪之亭曰呂梁榭前曰儀金亭翠玉館前曰擷秀亭萬歲山後曰玩芳亭

內閣

嘉靖十六年四月癸亥詔增修內閣

天子行寶曰

皇帝信寶曰

皇帝行寶曰

大明受明命之寶曰巡狩天下之寶曰垂訓之寶曰命德之寶曰討罪安民之璽曰勅正萬邦之寶

印信

征西鎮朔平羌平蠻等將軍銀印虎鈕方三寸三分厚九分柳葉篆文

宗人府五軍都督府俱正一品銀印三臺方三寸四分厚一寸

六部都察院并在外各都司俱正二品銀印三臺方三寸二分厚八分

衍聖公張真人中都留守司俱正二品各布政司從二品銀印二臺方三寸一分厚七分景泰三年賜衍聖公三臺銀印

順天應天二府俱正三品銀印方二寸九分厚六分五釐

通政司大理寺太常寺詹事府及京衛并在外各按察司各衛俱正三品苑馬寺宣慰司俱從三品銅印方二寸七分厚六分太僕寺光祿寺并在外

各鹽運司俱從三品銅印方二寸六分厚五分五釐

鴻臚寺并在外各府俱正四品國子監并在外宣撫司俱從四品銅印方二寸五分厚五分

翰林院左右春坊尚寶司欽天監太醫院上林苑監六部各司宗人府經歷司并在外各王府長史司司各衛千戶所俱正五品司經局五府經歷并
在外招討司安撫司俱從五品銅印方二寸四分厚四分五釐

在外各州從五品銅印方二寸三分厚四分

都察院經歷司大理寺左右寺五城兵馬司大興宛平上元江寧各京縣及僧錄司道錄司并在外中都留守司經歷司斷事司各都司經歷司斷事司各衛百戶所長官司及各王府審理所俱正六品光祿寺大官等署并在外各布政司經歷司理問所俱從六品銅印方二寸二分厚三分五釐

吏科等六科行人司通政司經歷司工部營繕所太常寺典簿廳上林苑監蕃育等署并在外各按察司經歷司各縣俱正七品中書舍人順天應天府府經歷司京衛經歷司光祿寺典簿廳太僕寺詹

事府各主簿廳并在外各衛經歷司鹽運司經歷
苑馬寺主簿廳宣慰司經歷司俱從七品銅印方
二寸一分厚三分

戶部刑部都察院各照磨所兵部典牧所國子監
總憲廳博士廳典簿廳鴻臚寺欽天監各主簿廳
并在外各布政司照磨所各府經歷司及各王府
紀善典寶典膳奉祠良醫工正各所宣撫司經歷
以上正從八品俱銅印方二寸厚二分五釐

刑部都察院各司獄司順天應天二府照磨所司
獄司鴻臚寺司儀署司賓署國子監典籍廳上林

苑監典簿廳內府寶鈔等各庫御馬倉草倉會同
館織染所文思院皮作局顏料局鞍轡局寶源局
軍器局都稅等司教坊司并在外留守司司獄司
各都司司獄司各按察司照磨所司獄司各府照
磨所司獄司及各王府長史司典簿廳教授典儀
所各府衛儒學稅課司陰陽學醫學僧綱司道紀
司及各巡檢司以上正從九品俱銅印方一寸九
分厚一分二釐。

各州縣儒學倉庫驛遞開壩批驗所抽分竹木局
河泊所織染局稅課司陰陽學醫學僧道司俱亦

門入東長安門

上具黑翼善冠黑犀帶素袍迎于東華門百官青素服于會同館前東西序立候與過次日早

上御西角門百官致詞慶賀若至在山陵

上翼善冠服百官錦繡服次日奉天門慶賀得旨奉迎遣文武大臣入門禮再議聞遣駙馬尉崔元大學士蔣冕奉迎

聖母禮官復議入門儀欲由正陽左門進大明承天端門午門之東王門入宮

上不允命再議禮部會議母妃南來自通州至朝陽

門進東安門便。上不從。親定其儀曰。

聖母遠來。宜從正陽門。由中道行入朝廟。其宮眷進朝陽東華等門。

進曆頒曆

吳元年十一月乙未冬至太史院進戊申年大統曆。先日中書省臣同太史院使以進曆聞。至是早

上御正殿。百官朝服侍班。執事者設奏案于丹墀。太史院官具公服。院使捧曆從正門入。屬官西門入。院使以曆置案上。與屬官序立。皆再拜。院使捧曆由東階陞。自殿東門入。至御前跪進。

上受曆訖院使與衛位皆再拜。乃頒之中外。既而
上召御史中丞兼太史院使劉基謂曰古者以季冬
頒來歲之曆似太遲。今于冬至亦爲未宜。明年以
後皆以十月朔進。

洪武二十六年六月壬寅命禮官重定頒曆儀。

皇帝具皮弁服陞奉天殿進曆官就位。樂作。四拜。樂
止。欽天監正由東階陞詣丹陛案前跪。搢笏奉曆。
由殿東門入至殿中跪。衆官皆跪。樂止。監正以曆
置于案。出笏興。樂作。監正復位。四拜。樂止。進曆官
退。執事舉百官曆案于丹墀中道。樂作。四拜。樂止。

傳制官由殿東門出。至丹陛東西向立。宣制曰。欽天監進某年大統曆。其賜百官頒行天下。樂作。四拜。樂止。散百官曆。樂作。駕興。

國朝治曆明時。以賜百官。頒行天下。屬欽天監官推算而事隸于祠部。每歲二月朔。欽天監奏進明年曆式。預行各布政司刊布。以授府縣。頒之民間。例以九月朔進呈。頒賜。嘉靖十九年。改用十月朔。

嘉靖七年十一月庚子朔。頒明年大統曆。禮部左侍郎李時言。頒曆必于十一月朔。今值冬至慶賀乞于十五日頒給。

上曰頒曆在月朔。合古天子頒朔之義。望日非宜。當于冬至次日行之。

東宮進曆

欽天監官捧曆于左順門。候奉天殿禮畢。由文華殿左門入。于殿東門外西向立。候陞座。鴻臚官贊四拜。導欽天監正官。陞至文華殿外。搢笏。搢笏捧曆。由東門入。至殿中。跪進曆。監正官啟。欽天監進某年大統曆。置于案。出笏。俯伏。興出。至拜位。四拜。興。退立。百官行禮畢。十八年後。欽天監官捧至文華殿左門。司禮監捧進。不行禮。

進春

洪武二十六年六月定進春禮。是日文武百官具朝服於丹墀內北向。引禮導應天府縣官就拜位。四拜。典儀贊進春。導府縣官舉春案由東階陞。跪置於丹墀中道。俯伏。興。四拜。文武官北向立。致詞。官詣中道。奏曰。新春吉辰。禮當慶賀。贊五拜。三稽首。樂止。禮畢。凡進春。先期奏聞。欽天遣官至順天府。候氣。屆期奏進。

萬曆八年定。先一日鴻臚寺設春案于皇極殿外東王門簷下。是日百官朝服侍班。上御皇極殿。順

天府官先就拜位樂作四拜與樂止內贊贊進春序班導順天府府尹至東王門外案樂作序班舉春案至正門外簷下樂止府尹至案前立鴻臚寺堂上官傳跪內贊贊進春府尹奏臣某等謹進某年春又奏

皇太后陛下春中宮殿下春某王殿下春俱午門外候請命司禮監官奉進承旨畢俯伏樂作興樂止府尹下序班舉春案外贊贊四拜興樂止順天府等官退文武百官入班位於丹陛中道跪致詞稱賀鳴贊贊俯伏樂作興五拜興樂止禮畢駕興

有司鞭春

永樂中定。每歲有司預期造春牛芒神。立春前一日。各官常服輿迎至府州縣門外。土牛南向芒神在東西向。至日清晨陳設香燭酒果。各官具朝服四拜。輿班首詣前奠酒三奠酒俯伏。輿復位。又四拜。各官執綵仗排立于土牛兩旁。贊長官擊鼓三聲。贊鞭春。各官環擊土牛者三。禮畢。

正旦立春

正統十年十二月。禮部尚書胡濙等奏。明年正旦立春。舊制立春。順天府官四拜。進春復四拜。文武百

臣。其各處賀表。宣讀重復。請通宣表文曰。忻逢長
至。恭遇聖旦。其在外衙門行告天祝壽禮曰。今茲
冬至。恭遇

聖旦。聖壽益增。

上從之。

聖旦遇服制

嘉靖元年八月壬午。禮部奏。初十日

萬壽聖節。文武百官朝服慶賀。今

武宗皇帝服制未闕。又遇

孝慈高皇后忌辰。宜免習儀。初九日。廷臣并進表官。

各具吉服於奉天門致詞五拜三叩首。表文免宣讀。詔可。

喪禮遇祭日喪服

嘉靖十四年正月鴻臚寺奏本月初十日俱祭祀期。雖大行莊肅皇后喪。然祭爲重。請令百官暫服青綠錦繡將事。

上又以會試係求賢吉典。考試執事官亦得服青綠錦繡。中供事則用淺淡服色。免宴。

藏水

每歲孟冬後水始冰。禮部預以藏水奏聞。精膳清

吏司官赴內府關匙鑰調役夫備器具赴正陽門外先掃冰室戶部以藁草蘆蒿襯室中候冰田內水堅擇潔淨者次第置冰室仍送鑰內府祠祭清吏司祀司冰之神其內府冰室則內官掌之。

赦日月食

其日

皇帝常服不御正殿中書省設香案百官朝服行禮鼓復圓乃止若月蝕大都督府設香案百官朝服不伐鼓雨雪雲翳則免

洪武二十六年三月更定赦日食儀禮部設香案于

露臺上向日設金鼓於儀門內。設樂于露臺下。官拜位于露臺上。下至期百官朝服入班。樂作。四拜。典樂止。跪執事者捧鼓班首擊鼓三聲。衆鼓齊鳴。候復圓四拜。典樂止。禮畢。月食則百官便服於都督府救護如儀。在外諸司日食於布政使司。府州縣日月於都指揮衛所。禮亦如儀。從之。

隆慶六年時日食後。大喪方成服。遇日食。百官先哭。臨後赴禮部。青素衣。黑角帶。向日四拜。不用鼓樂。

祈禱災祥

凡祈禱雨雪。及時禮部奏行。順天府于都城隍等

廟行香。禁屠宰三日。百官公所致齋。青衣角帶辨事。

凡各處雨澤有無乾溢霑足。以報禮部。

凡各處地震。山川異常。雨暘愆期。奏至禮部。年終類奏。行在京諸司。及南京禮部。并被災地方修省。皇子誕生儀。

嘉靖十五年定。皇子初生三日。上親詣南郊奏告。祭告奉先殿。崇先殿。遣官分告方澤。朝日夕月。太廟。社稷。天神地祇。行事俱祭服具告。文行三獻禮。祭品用酒果脯醢。南北郊加太牢。次日上御奉天門。

文武百官吉服稱賀。各吉服十日。頒詔天下如儀。
分遣官捧御書往各王府。

萬曆十年更定。皇子初生三日。遣官祭告南北郊。
太廟社稷壇。是日上具袞冕服御皇極殿。文武百
官朝服。鴻臚寺致詞稱賀。餘如常儀。仍遣官諭朝
鮮國王。

皇子命名

嘉靖十二年定。皇子生三月。翰林院擬數字上請簡
定。前期擇內夫人敬慎者。奉皇子剪髮前一日。

上詣太廟世廟。以名告于列聖皇考。至日早保姆

抱皇子于寢宮。剪髮爲髻。留角如禮。

上皮弁服御。軋清宮。陞御座。皇后率嬪之生皇子者。各服其服。朝見四拜。皇后侍立東面。嬪立于皇后後。保姆抱皇子出自寢。由西殿內。授皇子于皇后內。贊奏曰。皇后率某嬪某氏。敢告祗見皇子。上降座。命以制辭。遂執皇子之右手。而賜之名。皇后敬對畢。遂左還。授皇子于保姆。還寢。皇后復率嬪四拜畢。各還宮。次日。

上御奉天門。欽降手勅。以皇子睿名。傳諭禮部。行宗人府。上籍玉牒。隆慶二年儀同。

皇女誕生儀

嘉靖十五年定皇第一女生三日。

上具常服告闈于奉先殿崇先殿用香帛脯醢果酒告文是日皆吉服。

皇女命名儀

嘉靖十五年定皇女生弥命名如皇子儀不告廟。
皇太子與諸王書式

洪武十二年六月壬申翰林儒臣議皇太子與諸王書則曰記問荅諸王書曰記荅諸王奉書皇太子則曰謹啟。

上改皇太子與諸王書曰。記諭餘從之。

開讀

前期翰林院官承制草詔。禮部示百官于皇城。至日內使監設御座香案于奉天殿。尚寶司設寶案用寶案。侍儀司設宣讀案于午門外之東西向。宣讀官展讀官位于案之左右皆西向。鼓初嚴。禮部捧詔書入置于寶案。次嚴。百官序立午門外。三嚴。皇帝皮弁服出。禮部捧詔書至寶案。尚寶司請用寶。禮部同中書省官請于午門外開讀。中書省官捧由殿中門出。大樂作。拱衛司擎開遮護。降自中階。

由奉天中門出。樂止。金鼓前導。至午門外。置于龍亭。百官出班于午門外。東西贊拜。樂作。百官四拜。樂止。贊宣讀衆官跪聽。復置于龍亭。衆官興。樂作。四拜。樂止。搢笏舞蹈。山呼。出笏興。樂作。四拜。樂止。禮部同中省官入復命畢。

皇帝興。樂作。還宮。樂止。百官送至中書省。頒行天下。嘉靖六年定。前一日。鴻臚寺設詔案。錦衣衛設雲蓋。雲盤於奉天殿東。別設雲盤於承天門上。設綵輿于午門外。設宣讀案於承天門上。西南向。錦衣衛設鹵簿。教坊司設中和樂。及大樂。百官班承天門。

外橋南百官朝服入丹墀侍立。上具冕服御奉天殿。執事官進翰林院官捧詔書至御座前。東立西向。樂止。鳴鞭報時。鷄唱定時。文武百官入班。四拜。樂作。興。樂止。百官出至承天門外。鴻臚寺舉詔案於殿中。贊頌詔。翰林院官捧詔授禮部官。禮部官置于雲盤案上。校尉擎雲蓋從殿左門出。

隆慶六年詔從殿左門出。至皇極門。駕輿。至午門外。禮部官捧置綵輿內。樂作。公侯伯三品以上官前導。迎至承天門上。樂作。百官四拜。樂止。傳詔官陞案。曰。有制。百官皆跪。禮部官捧詔授宣讀官。宣讀。

訖。禮部官捧詔置雲盤中。贊俯伏興樂作。四拜舞。蹈如儀。禮部官捧詔授錦衣衛官。置雲匣中。絲索繫於龍竿。頒降。禮部官捧置龍亭內。鼓樂迎。至禮部。授使者頒行天下。

迎接詔赦

洪武中定。凡朝廷遣使各處開讀詔赦。如至開讀所。本處俱龍亭。綵輿儀仗鼓樂出郭迎接。朝使下馬。以詔書置龍亭中。南向。朝使立龍亭東。本處官朝服北面。五拜。衆官鼓樂前導。朝使上馬。龍亭後行。至公廨門外。衆官先入。東西序立。龍亭至。朝使立。

於東西向。如有出使官員。先於露臺上五拜東向立。衆官文武西樂作。贊四拜。朝使捧詔授展讀官。跪受宣讀。衆官皆跪。宣讀訖。興四拜。三舞蹈。山呼者三。俯伏興四拜。禮畢。本處官班首詣龍亭前。跪曰。聖躬萬福。使鞠躬曰。聖躬萬福。衆官退。易服而見朝廷。行再拜禮。朝使答禮。復具鼓樂送詔於官亭。凡遇詔赦經過道路。官員軍民人等道傍俯伏。凡出使在外。遇詔赦到外。與本處官同迎郊外。隨班行禮。有職者以品序。無職人便服。班于後。

頒詔總兵官

凡使者欽賫勅符丹符。若事干機密不得先報知。亦不得迎接。使者與衆官直至本署置勅符于案。使者立于案東。衆官四拜。使者取符宣讀訖。復置于案。衆官四拜。若賫詔書至總兵官處。近營十里先令人報總兵官。設香案于營內南向。列金鼓旗仗。率諸將出營迎接。見使者下馬。立于道傍。俟詔書過。乃上馬。後從至營門外。使者前。總兵官後。至營內。使者捧詔書置於案。立案東。總兵官等四拜。使者取詔書授宣讀官。衆官跪聽。以授使者。復置于案。衆官四拜。使者東立。總兵官西立。兩拜。若賫

制諭勅符手。詔至總兵官處。徑至營外。遣人密報總兵官。親出官迎接。使者前。總兵官後。至幕取置于案。使者立案東。總兵官五拜屏去左右。使者取制諭勅符。親授總兵官。

頒詔諸蕃

皇帝服通天冠絳紗袍。出御奉天殿。樂作。陞座。禮部官捧詔書于寶案前。用寶。中書省官禮部官同捧。至御前呈奏。以黃金袂裹置盤中。置于案。引禮導使者就丹墀拜位。典儀贊拜。樂作。使者四拜興。樂止。承制官由中門出。至丹陛上。曰。有制。使者跪承。

制官宣制曰

皇帝勅使爾基奉詔往諭某爾宜恭承朕命宣制
訖使者俯伏興樂作四舞樂止禮部官詣案捧詔
降自中陛以授使者大樂振作使者捧詔至午門
外置龍亭中侍儀奏禮畢

皇帝還宮各司正官一員送詔書出國門外使者入
蕃國境先遣人報蕃王王遣官遠迎前期令有司
於國外公館設幄結綵設龍亭于正中備金鼓儀
仗鼓樂候迎又於城內街巷結綵王宮內設闕廷
於殿上正中設香案於前設使者位於香案東開

讀案位於殿陛之東北。設蕃王拜位於殿廷中北。向衆官拜位於其南。捧詔宣詔展詔官位於開讀案之北。司禮二人位於南。引班四人位於衆官拜位之北。俱東西向。陳儀仗於殿廷東西。設樂位於衆官拜位之南。北向。其接詔官遠迎詔書迎於館中。安奉於龍亭。至日蕃王率國中衆官耆老出迎于國門外。王具冕服。衆官具朝服。五拜。王及衆官儀仗設樂前導。引詔書至官中。引禮導王入就拜位。衆官耆老各入就位。使者南向立曰。有制。樂作。王及衆官以下皆四拜。樂止。司贊唱開讀。宣詔官

展詔官陞使者詣龍亭。捧詔書授捧詔官。捧至閣
讀案。宣詔官受詔展讀。贊跪。蕃王及衆官以下皆
跪。宣詔訖。捧詔官仍捧置龍亭中。蕃王及衆官以
下皆興。樂作。四拜。樂止。鞠躬舞蹈。山呼萬歲者三。
樂作。復四拜。樂止。以詔書付所司頒行。王釋服與
使者相見。蕃王西。使者東。凡行禮皆司贊唱之。其
賜蕃國印綬。則曰。

皇帝勅使爾某授某國王印。爾其恭承朕命。如有賜
物。則併宣之。使者捧印并物。西向授蕃王。蕃王跪
受。以授左右。訖。俯伏興。王及衆官皆興。王復位。復

四拜禮畢。

文武官辭謝禮

洪武二年九月定文武官見辭謝恩禮。凡在京文武官員告假。及出使皆奉辭。還皆面見。凡奉特旨授官。卽時謝恩。到任之日向闕拜。省選者亦到任日望闕拜。或除郡縣官。給賜銀物。聽宣諭者。俱五拜三叩首。

皇后講女訓儀

嘉靖九年十月禮部奉

聖諭欲令翰林院撮諸書關女教者。撰爲詩言進呈。

以備宮中誦詠。仁孝文皇后內訓。

聖母章。聖慈聖皇太后女訓。行翰林院官。每日撰直解三章。仍引經傳及

高皇后傳內事實。每章不過百字。以便女官記誦。初六日

皇后率妃夫人詣

聖母前聽講畢。女官仍歌翰林院新撰詩一章。臣等又惟官壺邃密。宜令內閣類編二訓章旨。令講讀官通撰直解總集進呈。女官按期講解。又古禮絃歌。周南召南之詩。不用鍾磬。乃房中之樂。后夫人

諷誦以事其君子者。宜令宮中女官將二南之詩。被之管絃。以備宮中宴樂。斥去一應俗樂。其於閭德宮儀。尤有裨益。授書行欽天監擇吉。前一日女官設聖母寶座於宮中。設授女訓案於寶座傍。是日女官侍衛如常儀。

皇后具禮服。女官導詣

聖母前。四拜。女官贊授訓。舉案女官。舉授女訓案於御座前。贊跪。

皇后跪。贊恭聽訓命。贊與贊四拜。舉案女官舉案。皇后隨案還宮。次日

皇后詣

聖母前謝恩。

外戚朝見

洪武二十六年定 皇后父見

上行君臣禮后見父母行家人禮 皇太子見

皇后父母 皇后父母立于東西向 皇太子立于

西東向。行四拜禮 皇后父母立受兩拜。答兩拜。

表箋

吳元年春正月辛丑

上謂中書省臣曰。古人祝頌其君。皆寓警戒之意。迺

觀群下所進箋文。頌美之辭過多。規戒之言未見。殊非古者君臣相告以誠之道。今後箋文。只令文章平實。勿以虛辭爲美也。

表箋式

洪武二十九年秋七月。頒表箋文式於天下。先是天下諸司所進表箋詞體駢儷。

上獄之。命翰林院學士劉三吾。右春坊右贊善王俊華。撰慶賀謝恩表箋成式。頒于天下諸司。凡遇慶賀謝恩。如式錄進。

凡進賀表箋。親王於

天子前自稱曰第幾子某王某稱

天子曰 父皇陛下稱

皇后曰母后殿下若孫則自稱曰第幾孫某封某稱

天子曰 祖父皇陛下稱

皇后曰祖母皇后殿下若弟則自稱曰第幾弟某封

某稱

天子曰 大兄皇帝陛下稱

皇后曰尊嫂皇后殿下若姪則自稱曰第幾姪某封

某稱

天子曰 伯父皇陛下 叔父皇陛下稱

皇后曰。伯母皇后殿下。叔母皇后殿下。若封王者爲伯叔。及伯叔祖。則自稱曰某封臣某。稱

天子曰。皇帝陛下。稱。皇后曰。

皇后殿下。若從孫再從孫三從孫。自稱曰從孫某封某。再從孫某封某。三從孫某封某。稱。

皇帝曰。伯祖皇帝陛下。叔祖皇帝陛下。稱。

皇后曰。伯祖母皇后殿下。叔祖母皇后殿下。至嘉靖間始令各王府進賀表箋。止稱。

聖號不用家人禮。

洪武間定。凡進賀表箋。前一日結綵公廨及街衢。文。

武官各齋沐。公署宿歇。其日清晨。設龍亭於庭中。儀仗於庭外。露臺上之東西。設鼓樂於露臺南之東西北向。設表箋案於龍亭前。設香案於表箋案前。設進表箋官位於龍亭東。鼓初嚴。各官具服。鼓次嚴。引禮導班首香案前。滌印用印。以表箋置于案。班首退於幕次。鼓三嚴。各官入班。贊禮唱班樂作。四拜。樂止。贊進表。引禮導班首由丹陛詣香案前。跪。衆官皆跪。搢笏。執事者以表箋跪受。表箋置龍亭中。班首跪受。進表箋官俯伏興。班首復位。樂作。四拜。樂止。搢笏。三舞蹈。山呼者三。出笏興。樂作。

四拜樂止。金鼓儀仗鼓樂百官具服前導。進表箋。官在龍亭後東行至郊外置龍亭南向儀仗鼓樂陳列如前儀。文武官東西侍立。班首以授進表官。進表官受表卽行。百官以次退。凡進表箋。洪武二十六年定。

天壽聖節。在外五品以上官。進表文一。正旦冬至節。進

皇帝表文中。官箋文。東宮箋文各一。在外王府并布政司按察司直隸府州表箋俱各差官齎進。禮部各府州表箋進各府。各府進布政司。布政司類進。

禮部其各都司及直隸衛所齊進五軍部齊進至
日禮部官以聞。

正統間令天下諸司進賀表箋。非職官不遣。

萬壽聖節三司堂上官自進冬至等節首領官及所
屬府州衛佐貳官進。

凡遇正旦冬至。

聖誕之辰各處司府州縣官公所齋沐行禮告天祝
壽曰某衙門某官臣某等荷國厚恩叨享祿位皆
賴天生我

君保民致治今茲正旦冬至。

聖旦 聖壽益增。臣等下情無任忻躍感戴之至。
宣德四年。令在外慶賀如洪武初。舞蹈山呼十四拜。
凡進賀表。自親王各一。總兵官各一。朝鮮國王。一。
南京禮部等衙門一。浙江等布政司按察司直隸
府州等衙門各一。南京中軍等都督府一。中都留
守司浙江等都司直隸衛所等各一。

忌辰

永樂元年五月庚辰。禮部尚書李至剛等奏。五月初
十日恭遇

太祖高皇帝忌辰。今議得忌前二日。

上服淺淡衣。御西角門視事。至日早於奉先殿祭祀。
初八日至初十日。不鳴鐘鼓。不行賞罰。不舉音樂。
禁屠宰。文武官至初八日。服淺淡衣。黑角帶。侍朝。
至日早赴孝陵行禮。從之。仍命八月初十日。
孝慈高皇后忌辰。禮亦如之。於是至剛復緣宋制。
請于天禧等五寺。并朝天宮。令僧道誦經三晝夜。
上曰。人君之孝。與庶人不同。社稷所寄。生靈所依。但
謹身修德。深體天心。恪循成憲。爲經國遠謨。使內
無奸邪。外無盜賊。宗社奠安。萬民樂業。斯孝矣。
修齋誦經已之。

凡各廟忌辰

上服淺淡服。御奉天門視事。不鳴鍾鼓。百官黑角帶朝叅。

永樂元年御西角門視事。

宣德十年仍奉天門視事。罷誦經。

宣德三年令忌辰通政司禮部兵馬司勿引囚奏事。五年勅官員朝叅輟奏事儀。

弘治十四年令忌辰朝叅官不得服紵絲紗羅。遇奏祭祀服紅。

隆慶元年令遇忌辰文武百官俱烏紗帽黑角帶。不

用公服

降王拜位

洪武三年十一月詔禮部考定元降臣高昌王岐王陪祭禮儀尚書陶凱等言謹按唐諸蕃酋長在朝陪祭班于蕃客位宋降王李煜劉鋹陪祭各依所授官職立班今岐王高昌王既未授名爵宜借三品法服隨班陪祭從之

受降禮

洪武四年秋七月乙丑指揮萬德送明昇並降表至京師初

上聞大軍下蜀。命中書集六部。太常翰林院定議受降等禮。省部請如宋太祖。乾德三年受蜀主孟昶降禮。

上御奉天門。昶等于午門外。跪進待罪表。侍儀使捧表入。宣表官宣讀訖。承制官出傳制。官出傳制。昶等皆俯伏於地。侍儀舍人掖昶起。其屬官皆起。跪聽宣制。釋罪。昶等五拜。三呼萬歲。承制官傳制。賜衣服冠帶。侍儀舍人引昶入丹墀中。四拜。侍儀使傳旨。昶跪聽宣諭。俯伏四拜。三呼萬歲。又四拜出。丞相率文武百官行賀禮。

上曰。明昇與孟昶不同。昶專治國政。所爲奢縱。昇年
幼。事由臣下。宜免其叩頭伏地上表請罪之禮。是
日。昇及其官屬朝見。百官稱賀。制授昇爲歸義侯。
賜冠帶衣服。及居第于京師。

獻俘宣捷儀

永樂四年定。前期兵部官以露布奏聞。文武百官具
朝服。先一日。內官設御座于午門樓前楹正中。是
日早。錦衣衛設儀仗于午門前御道之東西。教坊
司陳大樂於御道南。東西北向。鴻臚寺設贊禮二
人于午門前東西向。承制官一人位于午門前西

向設宣制位于午門東稍南西向。設文武官及諸蕃使客人等侍立位于樓前御道南東西向。設露布案于午門前御道東。設宣露布官一。展宣露布官二。及刑部敲俘官位于午門前御道東西向。設敲俘將校位于午門前御道西北向。設進露布官位於御道南稍東。引禮導文武官東西序立。引進露布官捧露布置于案。退就位。敲俘將校引俘列于午門前武班之後。

上常服御奉天門。鍾聲止。鴻臚跪奏請

上乘輿樂作。至午門樓。

上陞座。樂止。鳴鞭訖。贊禮贊進。露布官四拜。樂作。平身。樂止。贊進露布。樂作。執事者。各按置于中道。樂止。宣露布。贊獻俘。獻俘將校。引俘至北。向立。俘跪于前。刑部官詣樓前中道跪奏曰。某官臣某奏曰。某官以某處所獻俘。請付所司。伺旨。有合受刑者。立于西廡。東向。以付刑官。若

上釋罪。承制官詣御道跪請制。由東街南行至宣制位。西向立。稱有曰。所獲俘囚。咸赦其罪。宣旨曰。有勅。釋縛所釋之俘。將校引俘起。文武百官入班。北向立。致詞。官跪致詞。賀訖。樂作。五拜三叩首。興樂。

止樂作。駕輿。百官以次退。次日行開讀禮如常儀。
第三日文武百官上表行慶賀禮如常儀。

遣祭儀

洪武二十六年定凡遣官祭祀。

皇帝具皮弁服陞奉天殿樂作。百官朝服一拜稽首。
東西立。引禮導獻官詣拜位四拜。傳制官丹陛東
西向立曰。有制。百官皆跪。宣制。祭孔子則曰。某年
月日祭先師孔子。大成至聖文宣王。祭帝王則曰。
先聖歷代帝王。命鄉行禮。贊俯伏。前一日沐浴更
衣。處於齋宮。次日還宮。

嘉靖間更定祭孔子制曰某年某月某日祭至聖先師孔子每三年遣道士齋祝文香帛詣所在陵寢致祭制曰某年某月某日祭先聖歷代帝王遣爾等齋捧祝文香帛詣陵寢致祭命所在有司行禮
賞廉能

凡獎賞廉能先期設

御座于會極門設賞案稍東文武執事奏事官吉服序班引廉能官青錦繡服至期于左掖門內斜廊面北序立候
駕出。

上陞御座。聽傳呼。序班導廉能官至東廊階下。面東立。鴻臚寺贊班。鳴贊贊一拜三叩首。內閣并吏部都察院堂上官。禮部錦衣衛掌印。官吏科都給事中。河南道御史。禮部郎中。俱于御座西面東序立。侍班御史二人。序班二人。俱面北立。執事序班四人。于賞案稍南面西立。鴻臚寺卿贊奏事。贊起案序班舉賞案置。

御前導廉能官。按南跪。吏部都察院。吏科都給事中。河南道御史。詣前跪。吏部奏廉能官。見在應朝某省某等幾員。候獎賞。奏畢。興廉能官叩首。天語獎

諭承旨叩首。

上曰。與賞賜酒飯。鴻臚寺卿并禮部郎中承旨。廉能
官叩首。興退。鴻臚寺卿黃起宗。序班舉案。吏部都
察院堂上官。吏科都給事中。河南道御史。跪致詞
仰惟

皇上留心吏治。澤被生民。臣等不勝慶抃。叩首。興。駕
興。各官退。

大班糾劾

凡大班糾劾朝覲官考察存留者。鴻臚寺官引詣
御路。法司及科道官各露章糾劾。怠職之罪。朝覲

官俱俯伏。免冠待罪。候

旨奉

旨免宥。隨加冠。叩首呼萬歲。次日謝恩朝。忝

凡朝覲官事完。辭朝。兩京府尹行太僕寺。苑馬寺
卿布按二司外班行禮畢。仍引見面辭。監運司知
府以下。止外班行禮。七年諭張真人。方外之流。無
民社寄其朝覲。免行

頒誥勅

洪武二十六年定。

皇帝陞殿。百官行禮畢。引禮導受。詣官詣拜位執事

官舉誥案於丹墀中道。吏部兵部官奏訖。贊四拜。樂止。執事官舉誥。按置於丹墀中道。贊跪伏。興樂。作又四拜。樂止。禮畢。

近制文武官誥勅。於常朝日。皇極門頒給。領誥勅。官朝服五拜三稽首。

官員受誥封贈。並焚黃儀。

洪武中定。凡受誥前一日。本家設誥案于正廳中。香案于南。其日具絲亭鼓樂。無絲亭用盤祿。誥將至。受封者出大門外迎接。命婦服冠服迎於門內。誥入。隨至廳前就拜位。執事者捧置于案。五拜三叩。

首捧誥入受封贈并受誥官詣家廟祠堂告知四拜受誥官并命婦於父母前四拜八年令官員祖父母誥至家祖父母父母與子孫具服拜受男子受於正廳婦人受於中堂不存者子孫拜受擇日焚黃凡焚黃前一日受誥於本家祠堂中至日清晨孝子以黃紙一書誥命置于案就拜位拜興上香三祭酒讀祝宣誥俯伏興焚黃酌酒禮畢頒賜受賜。

洪武三年九月上諭禮臣近頒賜之禮失序今後當以所賜物先置奉天門內引人入見聽宣諭後給

若物在後與貢獻何異

洪武八年二月重定頒賜及迎接詔語儀。凡朝官受賜於御前跪受衣則服以拜賜皆五拜禮。在官受賜者初四拜既受賜復四拜。

賜坐繡墩

洪武三年七月禮部尚書崔亮奏定皇太子以下及群臣賜坐殿坐墩之制。參酌宋與各爲等差。其制皇太子以青爲質。綉蟠螭雲花爲飾。親王亦如之。宰相及一品以赤爲質。飾止雲花。二品以下蒲墩。無飾。凡大朝會錫宴文官三品以上。武官四品以

上上殿者賜坐墩其朝退燕閑及行幸處則中書省大都督府官二品以上臺官三品以上及勳舊之臣文學之官賜坐者仍加絨殿綉褥命如其式製之。

政事碑

洪武三年七月詔於午門外擇空地立亭建碑刻國家政事可爲定式及政令之善者著以爲法。

進實錄儀

永樂元年定。

上御奉天殿文武百官朝服侍班鴻臚寺官導引寶

輿至丹陛上。史官舉實錄置於案。史官入班。鴻臚寺官奏進實錄。序班舉案以次由殿中門入。班首由左門入。

上興班首跪案前。史官皆跪。序班并內侍官舉實錄入。謹身殿。

上復座。贊四拜。贊進表。序班舉表案。由左門入。贊宣表。眾官皆跪。四拜。興。贊有制。史官仍入班。贊跪宣制。曰。

太祖高皇帝

高皇后功德光華纂述詳實朕心懽慶與卿等同之
宜訖俯伏興三舞蹈四拜禮畢。

萬曆五年續定前一日文武百官具朝服侍班監修
總裁纂修等官具朝服至館前監修官捧表置表
亭纂修官捧實錄置寶輿中用鼓樂繖蓋由會極
門下階至橋南由中道行監修總裁等官後隨由
二橋行至皇極門由中門入表亭監修總裁等官
由左門入至丹墀案前監修官捧表由東王階陞
置表案由東北邊下纂修官捧實錄置于案樂作
執事官五拜三叩首訖奏請陞殿。

上御皇極殿樂止。鳴鞭監修總裁等官入班。班丹墀。上鴻臚寺官奏進實錄樂作。以後如永樂儀。次日司禮監官自內殿送實錄下殿。仍置寶輿中。用繖蓋輿。監修總裁副總裁官同送至皇隻殿尊藏。進重書訓錄儀如進實錄儀。

進玉牒儀

弘治三年定。

上御文華殿。鴻臚寺官設玉牒案於左順門中。翰林院官捧玉牒置于案。序班二人舉案。鳴贊二人前導。錦衣衛官設傘蓋隨案行。由文華門中門入。翰

林院進玉牒官隨後從二門入至丹陛上序列序
班舉玉牒案由殿中門入置殿中出鳴贊贊四拜
畢序班從左門入舉御案進上前出進玉牒官一
員從右門入捧玉牒展於御案俟

上覽畢仍捧玉牒置於前案出就班序班由左門入
徹御案仍置殿內稍東出鳴贊贊四拜禮畢退丙
執事官收所進玉牒修玉牒起于正統年進玉牒
舊於文華殿至正德以後改於奉天殿萬曆四年
仍復舊制凡纂修書籍進呈文華殿如玉牒儀

王國禮

天子與王在朝廷惟以臣事君。

天子所執大圭。鑲字曰奉。

天法。

祖世世相傳。王來朝。

天子執大圭。王見圭如見

祖。

洪武六年令親王來朝勿同至。先嫡後庶。先長後幼。先者還後者至。居邊者有警免。伯叔踰五十不朝。孫姪踰六十不朝。世子代王來朝道里費毋預。有司。

六年令凡王遣使至直詣御前諸司勿有所阻九年春正月命翰林學士宋濂王府長史朱右等定議王國所用禮樂濂等奏王初之國所過州縣文武官便服迎四拜王至國冕服國內文武官朝服八拜其迎詔赦王冕服正旦冬至天壽聖節上表服如之其祭祀王皮弁服文武官賀王四拜稱賀再四拜朝服去蔽膝四品以下去佩王壽日冕服祭宗廟文武官不賀王府官屬每旦見省憲都司府縣官朔望見制曰可

凡詔赦至王國武官侍衛王不出郊文官朝服郊

迎王冕服于城外五丈遠至王宮王于臺上五拜
侍龍亭東武官護衛文官臺下十二拜。

十一年九月禮部言王國所屬諸司正至慶賀之
禮未有定制禮有等威尊無二上進箋非宜其令
王所臨處躬賀在外諸司則遣佐貳官一人往。

秋七月秦相府請王府敕護日月薄蝕之禮禮部
議日月之災自天子至庶人皆不遑寧處親王當
敕護但於露臺行禮不鼓。

十四年三月定王國慶賀禮儀凡遇

皇帝

皇后壽日。及冬至正旦。先期進表箋。王冕服就位。百官朝服。隨班俱四拜。王詣香案前跪。搢圭進表訖。復位。又四拜。搢圭三舞蹈。山呼者三。又四拜。禮畢。若

中宮箋文。不舞蹈。山呼。至日告祝天地。

皇帝壽日。則設香案於殿前露臺上。王冕服。文武官朝服于丹墀東西四拜訖。王詣案前跪。百官皆跪。王致詞興復位。又四拜。禮畢。冬至正旦如之。

皇后壽日。則設香案于宮內露臺上。王冕服。妃禮服。自行告祝禮如前儀。皇太子壽日。先期進箋。王皮

弁服八拜。百官朝服隨班。至日告祝天地。王皮弁服。百官朝服亦八拜。

十七年六月置親王博士。禮部取唐宋皇太子與師傅相見禮以進。博士西序東向。四拜。王東序西向再拜。其常見博士肅揖。王荅揖。若講授時。王中坐。博士侍坐于右從之。

十八年九月朔進曆。遣使者齋至王國。王常服八拜。後頒曆以十月朔。不遣使。附給各府。進冬至表人頒授。

又令凡大筵王坐存心殿。文官四品以上殿內。五

品以下兩廊。酒七行。樂七奏。後僉事亦令坐殿上。
十九年十二月詔親王建國處在城官慶賀。在外
官不賀。亦不遣官。

凡朝臣奉使至王府。或經過見王俱四拜。

永樂元年令王府有事。三司奏聞請旨。如擅行者罪。
八年令各王府遇朝廷使人勿賞。

成化三年春正月德王之國。禮部奏王之國沿途神
祇。近者親祭。遠者望祭。將至國前三日致齋。及至
城外。文武官率耆老出迎。不行禮。王詣社稷山川
壇祭祀。各官及耆老從王陞殿行賀禮。設儀仗於

露臺上下之東西。設大樂於露臺上。東西北向。陳金鼓旗於承運門外。設文武拜位于丹墀。設贊禮官二。東西向。護從執事官。先詣圓殿請王冕服。各四拜。王陞殿。大樂作。陞座樂止。贊班四拜。班首陞自東階。由殿東門入。跪致詞慶賀。衆官皆跪。班首復位。樂作。四拜。王還宮。樂作。各官出。

弘治十七年。令王府慶賀禮。每節止一舉。其扇餅之類勿進。如多使人勿與傳。

正德十三年。令各府庶人勿貢。

五月。定出使官朝見諸王禮。先是寧王宸濠驕恣。

撫按三司。或具朝服。如臣禮。御史范輅按江西。因言洪武間王府官屬亦稱官。其後乃稱臣。其州縣文武及出使官。凡遇慶賀俱稱官。四拜。出使官則便服。臣以爲尊無二上。凡不稱臣皆不宜具朝服。以嚴大防。寧王亦奏出使官如持節制使。賚詔行人之類。總兵巡按官久在地方。難以爲比。部議持兩端以請。詔仍集議。議再上。謂洪武末頒行

祖訓。便服行禮。總兵撫按奉有制勅行事。宜便服上令如

祖訓累朝故事行。仍以書諭濠

嘉靖元年五月靖江王經扶言。故事本府正至初度。各官慶賀朝服八拜。今各官常服四拜。乞坐罪。下禮部議。會典所載八拜。

洪武十八年所定其後

祖訓職掌俱不載。

弘治十一年四川巡撫都御史鍾蕃具奏。部覆文武官朝見慶賀四拜。朔望一拜。三叩首。近廣西布政司叅議梁億等具奏。部覆已奉

武宗皇帝旨。文武官俱常服四拜。

上曰。靖江何爲妄奏。其申諭各王。凡王世子及將

軍行禮。

景泰六年定宗子法重。在世子。家庭家人禮尊。在伯叔。嘉靖六年。令郡王攝府事者。詔赦至。有司抄黃送郡王。自率宗儀行禮。

隆慶元年。令親王朝覲。久不行。今後勿奏。

鎮國將軍禮

洪武二十九年十二月。命議鎮國將軍與駙馬公侯文武官相見禮。鎮國將軍居左。駙馬儀賓公侯居右。平行兩拜。三品以上官見之。亦兩拜。鎮國將軍答拜。若遇于道。向右讓道而行。內庭出入。出左門。

稱呼曰官人言語曰齋旨從之

儀賓班次

宣德三年十二月定儀賓班次先是寧王權言慶賀拜表儀賓未有定制

上命行在禮部考定儀郡主儀賓秩從二品縣主儀賓秩從三品郡君儀賓從四品縣君儀賓從五品鄉君儀賓從六品宜序于同品官之左

上曰禮不踰等儀賓雖親當守定分此爲定制

官員禮

洪武三十年令凡百官以品秩高下分尊卑品近者

行禮則東西對立。卑者西尊者東。其品越二三等者卑者下尊者上。其越四等者卑者拜尊者坐。有事則跪白。

成化二年定凡鎮守總兵巡撫等官列坐伯爵以上者居左。僉都以上者居右。若總督提督自僉都以上俱坐總兵侯伯之左。列名于前。

五年定在京法司會審于承天門外。東西重行列位。公侯駙馬伯東班。都督等官東後。尚書都御史侍郎西班。通政司大理寺佐貳官并六科掌科給事中。西後。禮部會議俱于闕左門東直房序坐。尚

書左右都御史坐于上。侍郎副都御史坐于下。通政司叅議大理寺寺丞等官坐于左。六科掌科都給事中坐于右。南京亦如之。八年定御史郎中員外主事奉勅同差者所差職名先後序坐。若部官奉勅會御史或御史會奉勅會部官以奉差之人坐左。次者右。其各差有關會御史者御史居左。若不同差則以首坐。

十四年定在外總兵巡撫官位次。左右都督與左右都御史並。都督同知與副都御史並。都督僉事與僉都御史並。

凡公侯駙馬一品二品官隨人馬遠者治罪

十六年令教官生員勿出郭迎。及妄行跪禮

嘉靖八年令巡按御史守令不得作威知府不得跪

風憲有司品級高卑

洪武三年春正月命內外風憲官與其屬官品爲禮先是禮臣言唐令准品級應致恭而非相統屬者則不拜。又京尹避臺官。宋制上佐州縣官。見本屬上官並拜于庭。叅令本府賓幕官及掾縣令簿尉叅本府錄事簿尉叅令皆答拜。今擬有司品高者

與上司品卑者相見平拜。若依品爲行禮，則省郎中、府臺、經歷、按察司僉事等官皆拜知府，省府臺都事皆拜知州，省臺照磨管勾、府知府皆拜知縣。與唐宋之制異。

上曰品從所以別上下，明尊卑，其監察御史、按察司僉事如出巡當拜知府知州，知府知州有罪監察御史按察司官按問得實則于市中斷罪。如是則風憲官知有品級，不敢凌辱有司，有司自知羞耻，畏懼不敢干犯法度。此法雖異前代，亦激勸之道也。近知府知州見御史僉事俱長跪白事，出巡則

長跪道傍。雖累經詔旨釐正不從也。御史出巡。即大中丞亦分廷抗禮矣。

三司禮

天順七年七月。福建三司官以賤情事聞。其奏本先布按二司。後都司。

上謂都察院官曰。三司品有定制。今失序如此。其行事可知。其禁約各處。三司奏本坐次。悉如品級。若都布二司官有犯。該按察司覈之者。送巡按御史鞫問。違者重罪之。

申明有司迎送巡按之禁

宣德六年五月己巳申明御史巡按有司迎送之禁
初御史傅吉巡按江西布政司孟桓等率官屬出
郭迎候又陪朝寧王府官奏其違法

上命吉等自陳皆服罪

上諭都御史顧佐等曰風憲官守法乃能以法治人
今御史多輕薄少年喜人諛佞控辱外官亦不能
自執禮法諂佞成風其榜示禁約違者悉罪之

南京會議坐次

成化五年閏二月禮部右侍郎葉盛言在京法司凡
遇審錄俱於承天門東西分爲四行列坐公侯駙

馬伯東班前行。都督等官後行。尚書都御史侍郎等官。西班牙前行。通政司大理寺佐貳官。并六科掌科給事中後行。及禮部會議民情。俱於闕左門東直房中序坐。尚書左右都御史等官坐于上。侍郎副都御史等坐于下。通政司參議大理寺寺丞等官。東傍六科掌科事給事中西傍。俱有次序。南京乞如北京坐次從之。

南京科道迴避

嘉靖十五年十一月。先是南京禮部尚書霍韜言。南京文官無論品秩崇卑。皆用肩輿。卑不避尊。乞申

明禮制時禮科都給事中李克濁等。各抗章謂近侍之臣。不當迴避。章下所司。左都御史王廷相。及禮部侍郎黃宗明。張璧。議覆班列有定體。大宴四品以上。及學士陞殿。東西侍坐。六科都給事中。左門序坐。六科給事中。丹墀東西座。又官員迴避條。七品遇四品以上。引馬迴避。遇五品側立。遇六品讓道而行。今給事中教場比試。與侯伯並坐。選官賜酒飯。與吏部尚書侍郎相向坐。與兵部尚書侍郎並坐。此會典所不載。夫尚書侍郎一也。吏部則相向。兵部則並坐。非定體矣。引馬迴避。成規具在。

其南京給事途逢九卿立馬拱手不知所始。一王之制萬國同文。豈以南北殊異。今兩京四品以下不乘轎。其蔽幃女轎宜禁止。請勅南京諸臣四品以下尊制乘馬。其六科遇大臣引馬遜避。違者糾正。

上是之。仍詔以後故違者叅治。

官員到任禮

一叅見禮。先皂隸。次吏典。各兩拜。新官坐受。次屬官亦兩拜。新官拱手。次首領官兩拜。新官起身拱手答禮。次佐貳官兩拜。新官亦兩拜。如佐貳官到

任。先受所屬并首領官禮。後至長官前兩拜。長官出公座答畢。諭寮屬曰。朝廷設官置吏。欲其敬神恤民。親賢遠姦。興利除害。某不敏。忝茲重任。尚賴一二僚屬。及邑中長者。匡其不逮。庶免後艱。其四境之內。利有當興。弊有當革者。某等當共竭力爲之。以安黎庶。諭畢。署押公文。各房吏典將公事施行呈報。新官署押。如長官則交印信匙鑰。署判公事畢。將所祭牲酒。與父老享飲而退。其九年考滿。仍具牲酒。率官屬父老人等辭廟致祭。以祭物出郊餞別而去。

拜禮

洪武二十年冬十月重訂官員拜禮其一凡朝見稽首頓首五拜。乃臣下見君上之禮先稽首頓首四拜。後一拜叩頭成禮。稽首四拜者百官見東宮親王之禮。其見父母亦四拜。其餘官長親戚朋友相見。止許行兩拜禮。

公座

官員公座。凡大小衙門官員。每日公座行肅揖禮。佐貳官揖長官。長官答禮。首領官揖長官。佐貳官。長官佐貳官拱手。凡文武官公聚。各依品級序座。

若資品相同者。則依衙門次第。若王府官屬。與朝官之次。

致仕與有司班

成化十一年正月。國子監祭酒周洪謨言。時節行禮。宜令致仕官。與有司官。依品高下。序列班次。事下所司議。禮部覆奏。所言致仕與見任同。乞通行天下。遵守。及受封官。亦與致仕者同。

相見禮

洪武五年三月辛亥。命禮部重定官民相見禮。先是元俗。官僚相見。跪一足。爲禮拜。則叩首。既拜。復跪。

一足屬官下人見上司官長卽引手於後退却若避之然上甚厭之。至是復定爲儀。凡內外諸官。每旦會公堂。肅揖就坐。幕官先揖。長官退就幕。署其屬官見上官必序立。堂陛之上躬揖。上官隨坐。隨立拱手。荅禮。幕官荅拜如初見。及以事出而還。見上官再拜。見幕官亦然。上官拱手。幕官荅拜。品秩等者互揖。凡內外掾史令史書吏宣使奏差人等。晨謁長官階下一揖。長官不荅。幕官拱手。如節序及公叅。或差遣辭見俱兩拜。長官不荅。幕官荅。凡典吏見幕官亦序立。階下肅揖。幕官不荅。如時節。

公叅差遣辭見兩拜。幕官拱手。凡子孫於祖父母。每日肅揖。若遠出旬日。及節序慶賀。皆四拜。餘尊長亦然。若尊長之疎遠者。行肅揖禮。遠出旬日。及節序慶賀兩拜。

官員禮儀

洪武十五年三月更定官員相遇。及公叅禮儀。凡五軍都督府。左右都督都督同知。駙馬都尉。遇公侯於路。引馬側立。都督僉事六部尚書。遇公侯。引馬却避。品級相等者。分路行。金吾等衛指揮。遇公侯。引馬却避。遇左右都督都督同知。駙馬都尉。引馬

側立。遇都督僉事六部尚書分路行。六部侍郎各
衛指揮使。及同知通政使太常卿光祿卿太僕卿
京府尹三品官遇公侯。左右都督都督同知駙馬
都尉引馬却避。遇都督僉事六部尚書引馬側立。
品秩相等者分路行。各衛指揮僉事左右通政太
常少卿國子祭酒四品官遇公侯左右都督都督
同知都督僉事駙馬都尉六部尚書引馬却避。遇
六部侍郎通政使太常卿光祿卿太僕卿引馬側
立。品級等者分路行。六部郎中員外郎欽天監令
太醫院令都事經歷斷事官大理寺卿通政司參

議左右春坊庶子論德五品官遇公侯以至三品官引馬却避。遇四品官引馬側立。品級相等者分路行。六品以下官倣此。翰林學士直學司卿少卿。遇公侯左右都督都督同知驛馬都尉引馬却避。二品官引馬側立。遇三品四品官分路行。尚寶司丞侍講以下官倣此。承勅郎給事。中書舍人監察御史。遇公侯以下至三品官引馬却避。遇三品官引馬側立。四品以下官分路行。殿儀司正副。遇公侯以下至三品官引馬却避。四品官引馬側立。遇五品官以下。分路而行。凡所屬見上司官者。引

馬却避。所屬官品高者。遇上司官卑者。分路行。凡未職任者。遇有職官員引馬却避。凡官員應合避而路狹不可避者。下馬拱立。應行路不得中道行。依次分左右。凡被宣召及祠祭官詣祠祭所。并有所捕逐者。在道雖遇應避之官不避。凡官員公叅都督府同知僉事叅左右都督指揮同知僉事叅指揮使。六部侍郎叅尚書。各衛指揮叅都督。拜于堂下。千百戶叅指揮。亦如之。京縣知縣叅府尹。拜于堂下。各府州縣亦如之。諸司佐貳官幕職官。叅本司長官。皆各拜。所屬卑官叅見者不答。品級等。

官者答拜所屬官品級高者與上司官卑者均禮
近詞臣以宣召雖遇公侯尚書不引避而都督以
下雖雜流遇之不側立京師緹騎募卒商賈遊人
與搢紳分道而驅無章甚矣

書劄名字

洪武三年五月

上諭中書省臣曰今人書劄多稱頓首再拜百拜非
禮其定儀遵守又小民不知避忌取賢聖國寶等
字爲名宜禁之于是禮部定議凡致書于尊者曰
端肅奉書答則曰端肅奉復敵已者曰奉書奉復

上與下曰書寄書。答卑幼與尊長曰家書。敬覆尊長與卑幼曰書付某。其名字有天國君臣聖神堯舜禹湯文武周漢晉唐等國號悉更之。

閣中文移

景泰元年九月戶部尚書兼翰林院學士陳循言臣待罪翰林職掌制勅凡六部都察院俱堂上官僉書用印方許送院其院中移文各堂上臣僉書各司屬孔目僉各從之

諸司文移式

洪武十五年閏二月甲申命禮部定諸司文移式先

是以六部轄各布政使司。都察院轄各按察司。五軍都督府分轄各都司衛所。惟金吾等十二衛指揮使司係親軍。王府長史司及護衛俱無統屬。文移未定其式。至是定議。六部及親軍諸衛欲移文護衛。皆由都督府行於本國境內。都指揮使司轉達。若五軍都督府及親軍并在京各衛欲移文長史司者。皆由六部行於本國境內。布政使司轉達。其護衛及長史司回文亦如之。其六部及京衛文移在外都指揮使司。并直隸衛所。由五軍都督府行之。五軍都督府於各布政使司。并直隸府州由

六部行之。其於按察司。皆由察院行之。著爲令。

洪武十六年七月五軍都督府。有事于都察院。令經歷司呈院。如行六部。則經歷司與主事廳互牒。其在京秩三品者。與本院平行。仍故牒在京四品。在外按察司。帖下在京五品以下衙門。行移本院。俱稱具呈。惟大理審刑。磨勘司與本院經歷司。行移各道監察御史。止由本院與諸司無行。

鄉人禮

凡民庶以齒爲先後。致仕官序爵。爵同序齒。至親則不論爵。

洪武五年令凡鄉黨序齒民間士農工商宴會揖拜之禮幼者先施坐次長者居上如佃戶見佃主如少事長親屬不拘主佃止行親屬禮

十二年令內外官致仕居鄉惟宗族序尊卑宴則別席不坐無官者下如與同官會則序爵爵同序齒與異姓無官者相見不荅禮庶民以官禮見敢有凌侮者論如律

二十六年定凡民間子孫弟侄甥婿見尊長生徒見師範奴婢見家長久別兩拜近別揖其親戚長幼久別兩拜近別揖禮

大射禮

洪武三年五月丁未詔行大射禮初

上以射禮久廢。弧矢之事。專于武夫。而文士多未解。至是詔太學生及郡縣學生員習射。凡遇郊廟之祭。先期命文武執事。行大射之禮。乃命工部制虎中鹿中。及諸侯卿大夫射侯等器。命禮部考定其議。斟酌古今。煩簡適中。于是禮部奏曰。按周禮太司馬之職。王大射則合諸侯之耦。其屬有射人掌侯。司弓矢。掌六弓八矢之法。服不氏掌贊張侯。以旌屈之而待獲。古大司馬。今兵部也。宜令掌之。其

射鵠有七。虎鵠五采。天子射用之。熊鵠五采。皇太子射用之。豹鵠五采。親王射用之。豹鵠四采。一品二品文武射用之。糝鵠三采。三品至五品文武官射用之。狐鵠二采。六品至九品文武官射用之。布鵠無采。文武官子弟及士民俊秀射用之。乏。又名容。凡射時置于鵠右。執旗及待獲者以蔽身。設福并常。當射時置于前以齊矢。設中射五皮。樹中天子大射用之。閭中天子宴射用之。虎中皇太子親王射用之。兕中一品至五品文武官用之。鹿中六品至九品及文武官子弟士民俊秀通用之。其職

事設司正官二員。掌驗射者品級尊卑。人力強弱。而定耦。其中否則書于等。兵部官職之。司射二員。掌先以強弓射鵠。誘射以鼓衆氣。以武官充之。司射器官二員。掌辨弓力強弱分三等。驗人力強弱而授之。工部職之。舉爵者二員。掌以馬。漣授中者。欽。光祿寺官職之。請射者。掌定耦射射畢。再請。

耦射。每鵠二人。侍儀司職之。待獲者。掌矢。納于司射器者。以各隸僕供其後。執旗者六人。掌于後。執五色旗。如射者中的。舉紅旗。應之。中。采舉采旗。應之。偏西。舉白旗。偏東。舉青旗。過于鵠。舉黃旗。不及。

鶴舉黑旗。以軍士二人掌之。設引禮二人。掌引文武官進退。命侍儀司舍人職之。制曰可。仍命頒儀式于天下。官府學校。遇朔望則于公廡。或閑地習之。

僧道

洪武二十四年。令佛經番譯已定者。不許增減辭語。道士設醮。亦不許奏青詞。各遵頒降科儀。民有效瑜珈法。稱爲善友。假張真人名。私造符錄者。重罪。二十七年。榜示天下。毋得私創庵堂。僧道有妻妾者。許諸人趕逐。亦不得收民間兒童爲僧。

永樂十年諭禮部天下僧道多不守戒律民間修齋誦經無誠心甚至飲酒食肉遊蕩荒淫又有無知愚民妄稱道人蠱惑男女雜處無別敗壞風化

洪武中僧道不務祖風及俗人行瑜珈法稱火居者有禁即揭榜申明違者殺不赦

十六年定天下僧道府不過四十人州不過三十人縣不過二十人

凡清理寺觀

洪武二十四年令清理釋道二家凡各府州縣寺觀但存寬大一所併居之不許雜處于外違者重罪

親故相隱者流。願還俗者還聽。

令天下僧道有剏立庵堂寺觀。非舊額者悉毀之。
嘉靖十四年大興隆寺燬。永不復。并大悲恩寺俱革。
凡真人名號。洪武中華前代所稱天師。止稱正一
真人。

隆慶二年勒令繳納真人府印。止承讓上清觀提點。
器皿。

凡官民所用金銀磁器。不得製龍鳳文。及僭用金
酒器爵。其椅卓木器。不得用硃紅金飾。公侯伯及
一品至二品。酒注酒盞用金。餘用銀。三品至五品。

皇明典禮志卷之二十一
三十一
酒盞用金。餘用銀。六品以下。酒器用銀。庶民酒注
用錫。酒盞用銀。餘用磁漆。商賈技藝之家。器皿不
得用銀。餘與庶民同。

床帳。

凡官民床榻不得雕刻龍鳳文。并硃紅金飾。床帳
不得用玄黃紫。及織繡龍鳳文。

期年不奔喪。

洪武二十三年閏四月甲戌除期年奔喪之制。先是
百官聞祖父母伯叔兄弟喪。俱得奔赴。至是吏部
言祖父母伯叔兄弟皆係期年服。若俱令奔喪。守

制或一人連位五六期矣或遠居千里則居官日少更易繁數曠官廢業公家之計父母及祖父母承重者丁憂外其餘期年服皆不齊喪從之。

期功廻避

嘉靖十三年孟冬享廟先期命詹即顧搢臣霍韜皆有期功之服。

上言古禮期服諸侯絕大夫降今之公卿卽古之諸侯而猶有期服非禮也律言緦麻以下皆不與祭者謂其身蒞之也百官聞期年之訃不過私家爲位及踰旬月則無容避矣。

上令禮官考議以聞。於是尚書夏言奏封建法廢。世無諸侯久矣。古之諸侯建邦啟土。世有其國。伯叔兄弟皆其臣也。故期服可絕。不知今之公卿能臣。其伯叔兄弟乎。又曰。在位則爲公卿。釋位則爲族屬。不知喪服之制。人情之所由生也。豈以在位爲隆殺哉。夫哀有淺深。故服有輕重。祭祀吉禮致敬。神明若情未忘。哀則不專。誠于祭。故不與也。禮曰。小功總麻。執事不與。禮言小功總麻。但可執事。至錮奠之禮。重則不敢與也。今二臣小功麻。服之重者也。太廟捧主。又禮之重者也。以服之重。而與禮。

之重者。得謂知禮乎。詔鼎臣韜迴避。以侍郎黃宗明林廷楫代之。且令自後廟享前五日。太常寺卽奏捧主官十餘人以請。

爲大臣發喪禮。

洪武二年十月庚午。命禮部議天子爲大臣發喪禮。禮官請以宋太祖爲韓王趙普舉哀故事。其儀聞計于西華門。壬地設御帳南向。陳御座于正中。上置素褥。侍儀司設計者位于前。設文武官陪哭位。東西向。奉慰位于計者位北北向。其日拱衛司備儀仗。奉迎車駕。引禮導文武百官素服。由西華門。

入就陪哭位。引計者亦由西華門入。立于西南侍儀奏外辦。

皇帝素服乘輿詣幄。儀仗分別和聲。郎陳樂設而不作。太常卿于幄西跪奏。某官來計。某年某月日臣某官以某疾薨。請舉哀。

皇帝哭。文武官皆哭。太常卿跪奏止哭。

皇帝止哭。百官皆止哭。文武官就奉慰位北向立。班首詣御前跪。百官皆跪。奉慰畢。俯伏興。分班立。引禮導計者就拜位。四拜。興。計者退。太常卿奏禮畢。皇帝還宮。計者及文武百官以次出。明日舉哀如前。

儀

恤典

一公侯及在京一品二品父母妻喪三品四品父母喪各與祭葬在外止與祭未封贈者不與凡公侯祭二有功者祭十六駙馬祭十五

凡伯祭二有功者祭十五

凡公侯伯母與妻俱祭二有葬皇親有加凡兩京二品以上文官并父母妻三品文官并父母授封者俱與祭葬

凡一品官祭九父母授封至一品者祭二妻祭一

凡尚書左右都御史祭二。其加有三少。或兼大學士祭四。父母妻祭俱一。

凡兩京三品官祭一。兼學士贈尚書者祭二。

凡四品五品官。特恩賜葬者。以品爲定。行聖公葬祭如一品。

凡左右都督至都督僉事俱祭六。母妻祭一。有葬。

凡都督僉事以上。祭一無葬。中都留守正副祭一。

凡在京都指揮使。及同知僉事叅將祭一。

凡錦衣衛等官指揮使同知僉事俱祭一。

凡外國使臣病故。所在官司賜棺及祭。

凡公侯歿于王事者加祭二。

隆慶三年更定。凡文官以侍從春宮及軍功應沾卹典者。取自上裁。有特恩加祭葬于本品加一等。無祭者與祭一。無葬者與半。應半葬者全與。

謚

凡議謚。洪武初。禮部請旨行。

二十五年。令禮部行翰林院請旨行。

凡親王謚一字。郡王二字。冒襲王爵。改正者無謚。凡文武大臣。賜謚亦二字。與否自上裁。若官品卑而侍從有勞。或以死勤事者。特賜謚。

皇朝典禮志卷之二十一
弘治十五年令大臣請謚。吏兵二部覆其生平。定爲三等。行業俱優者上。行實頗可者中。行實無取者下。送翰林院擬謚。請旨。有應謚而無謚者。撫按科道官以聞。

輟朝

凡

皇妃喪輟朝三日。發引下葬各一日。親王喪輟朝二日。公主喪及下葬各一日。郡王及文武大臣喪。年終類輟朝一日。先期禮部具奏。出示長安左右門。至日早朝。不鳴鍾鼓。不鳴鑼。不設儀仗。文武百官

各服淺淡服黑角帶。于奉天門朝參。其謝恩見辭官亦不用公服。如常朝官服色。

公侯喪輟朝

洪武二十三年三月命禮部定公侯卒塋輟朝禮。著爲令。凡公侯卒于家者。聞塋輟朝三日。下塋輟朝一日。卒于外者。聞喪輟朝一日。喪柩至京輟三日。下葬仍輟一日。輟朝之日。不鳴鍾鼓。各官服淺淡色衣。烏紗帽黑角帶朝參從之。

論曰夫禮有曲。而殺有經。而等內心外心。三千三百。

高皇制禮至纖至悉。歲時之節。尊卑之等。拜起之文。應對之節。皆裁自聖心。行之四海。事大積焉而不死。並行而不謬。細行而不失。立隆以爲極。而莫之能損益矣。

皇明典禮志後序

稽古臯陶之謨天敘有典勅
我五典五惇天秩有禮自我
五禮有庸明非

天子不議禮而記禮者曰禮之
所興衆之所治禮之所廢衆
之所亂則其為教微而止邪

豫哉

高皇帝肇造區夏，初立禮制，殫精極思，一洗胡元之陋，而與天下更始，洋洋乎盛矣。

列聖相承，更定而潤飾之，載在令甲，昭垂寓內，蓋燦然大備焉。以故二百五十年来，濡于

肅雖盡于太和歌鹿鳴而詠
天保奏關雎而陳棠棣賡采
薇而誦楚茨舞干羽于兩階
燔牲柴于喬嶽賈誼不悲乎
俗靡班固侈贊其隆風於都
哉與唐虞比烈矣立隆為極
宰制萬物詎非萬世不刊之

典哉夫三代之盛禮有損益
然至周始稱郁郁孔子志在
唐虞而論禮則曰吾從周豈
獨其制之善亦不倍之誼思
與天下共之也宗伯明龍郭
公櫛撫令甲諸書詮次成一
家言為

皇明典禮志上自

朝廷下及士庶縷分條析昭炳
日星誠一代之完書而經世
之大業也倘亦從周之意乎
淄川東溟高公仗中丞鉞撫
鎮兩浙以興起禮教為已任
得是編而出以示不佞康蓋

有味乎其言之也不佞康拜
手加額遂付殺青用廣宗伯
之傳於不朽毋寧謂不佞康
與中丞同生聖人之鄉竊私
淑乎其所為不佞者亦思與
天下共之哉

萬曆四十一年仲冬長至日

浙江等處承宣布政使司左
布政使前四川道監察御史
東魯劉汝康謹序